

四庫全書

子部

欽定四庫全書

子部

記纂淵海卷三十四

詳校官中書臣余日煥

侍讀臣孫球覆勘

總校官降調編修臣倉聖脉

校對官中書臣陸湘

謄錄監生臣沈希賢

欽定四庫全書

記纂淵海卷三十四

宋 潘自牧 撰

職官部

監司

吏刺史銀印青綬 位居牧伯分刺諸州

百官志

王陽為

益州刺史行部至邛崃九折坂歎曰奉先人遺體奈何

數乘此險及王尊為刺史至其坂問吏曰此非王陽所

畏道邪吏對曰是尊叱其馭曰驅之王陽為孝子王尊

為忠臣 黃霸為揚州刺史治有績宣帝詔賜車蓋特  
高一丈以彰有德 朱博為冀州刺史博本武吏不更

文法行部吏民數百遮道自言從事欲以觀試博博決

如神吏民大驚

並前漢

郭伋為刺史行部到西河美稷有

童兒數百各騎竹馬于道次迎拜曰聞使君到喜故來

奉迎 蘇章遷冀州刺史故人為清河太守章行部請

太守為設酒殽甚歡太守喜曰人皆有一天我獨有二

天章曰今夕蘇孺文與故人飲者私恩也明日冀州刺

史按事者公法也遂舉正其罪 郭賀為荊州刺史有  
殊政顯宗賜以三公之服黼黻冕旒勅行部去襜帷使  
百姓見其容服 賈逵為豫州刺史舉奏二千石以下  
阿縱不法者帝曰逵真刺史也 賈琮為冀州刺史之  
部言曰刺史當遠聽廣視糾察美惡何有反垂帷裳以  
自掩塞乎乃命御者褰帷百城聞風竦震諸賊過者望  
風解印而去 謝夷吾為荊州刺史第五倫薦之曰尋  
功簡能為外臺之表聽聲察實為九伯之冠 李膺為

青州刺史守令畏其威名聞風棄官 种嵩為梁州刺

史被召當遷吏民詣闕請留之太后嘆曰未聞刺史得

人心若是乃許留一年

並後漢

刺史銅印墨綬

晉百官表

晉向

雄為秦州刺史假赤幢曲蓋鼓吹

晉書

吳隱之為廣州刺

史酌貪泉賦詩

地理部

楊逸為光州刺史廣設耳目善惡

畢聞咸言楊使君有千里眼那可欺之

本傳

傳記秦置監察御史漢省之後復置文帝以御史不奉  
法乃遣丞相史出刺并督察御史武帝元封五年初置

部刺史掌奉詔條察州以六條問事秩六百石居部九  
歲舉為守相成帝更為州牧秩真二千石位次九卿哀  
帝復為刺史天壽復為牧光武復刺史乘傳周行郡國  
錄囚徒考殿最舊制州牧奏二千石事皆先下三公光  
武不復委三府故權歸刺舉之史靈帝改為牧魏晉為  
刺史持節都督庶姓為單車刺史後魏州置三刺史隋  
開皇三年罷郡以州統縣自是刺史之名存而職廢  
後有刺史皆太守之互  
名理一郡而已煬帝罷州置郡置司隸臺大夫一人

巡察畿內刺史十四人巡察畿外唐罷郡置州神龍二年分天下為十道置巡察使二十人景雲改置按察使開元改置採訪處置使至德之後改採訪使為觀察并領都團練治于所部之大郡職源分馳郡國督察在位其

數以言錄見囚徒

漢官解詁

集周以十聯率諸侯若今之廉察

白集

廉問七州

牛僧孺

歷

居廉鎮

崔鉉制

泊廉視浙右

李德裕

玉節居分陝金貂總上

流麾軍時舉扇作賦且登樓年光徧原隰春色滿汀州



日華三翼舸風轉七星旂向解青絲纜將移丹桂舟

梁元

帝綉衣春當霄漢立

杜詩

州家申明使家柳

韓集

堯置州牧

四岳持而綱之

柳文

本朝初有轉運使淳化及景德增提刑熙寧又置提舉

會督刺之寄

南豐

委節傳分按州郡

公是行周沆制

分龍節以典

州驩歷劇部

公是謝表

### 轉運使副判官

史楚漢相距滎陽蕭何轉漕關中給食不乏高祖曰鎮

國家撫百姓給饋餉吾不如蕭何

漢書

光武謂寇恂曰昔

高祖留蕭何鎮關中吾今委公以河內堅守轉運給足

軍糧光武于是北征恂收租四百萬斛以輦車驪駕轉

輸前後不絕

後漢書

諸葛亮出祁山以木牛運由斜谷出

以流馬運

蜀志

裴耀卿充轉運使置河陰集津二門倉引

天下租繇盟津汴流而西三年積七百萬石省費三十

萬緡

唐書

劉晏以轉運為己任凡所經歷必究利病運米

數千萬石以濟關中歷代操利柄為國計者莫不損下

益上危人自安變法以弄權斂怨以構禍皆有之矣如  
劉晏通壅滯任才能富其國而不勞于民儉其家而歸  
利于衆第五琦促辦應卒民不加賦而國豐饒亦庶幾

矣  
唐書

傳記唐先天二年李傑始為水陸發運使開元二十一  
年裴耀卿充江南淮南轉運使而崔希逸蕭旻為副天  
寶以韋堅充勾當轉運使第五琦充諸色轉運使劉晏  
充諸道轉運使其後韓滉杜棕杜讓能崔昭緯皆以宰

相充使而諸道分置巡院皆始于此五代罷巡院始置

轉運使

唐會要

本朝乾德以後始置諸道轉運使以總利權開寶六年  
廣南平除徐澤為判官蓋轉運判官始此其轉運使國  
初但曰勾當某路水陸計度轉運使官高者曰某路計  
度轉運使太平興國初皆曰使兩省以上則為都轉運  
使又置副使與判官焉又置同勾當轉運使尋罷諸路  
副使真宗每用兵或令都部署兼轉運使王師征討則

有隨軍轉運使慶厯中皆帶按察之任實錄熙寧二年詔

轉運使用本資序下一等為權二等為權發遣中興以

來逐路都轉運使除授不常唯使副判官常置紹熙以

來使副運判不雙除開寶九年詔諸道官吏宜令轉

運使廉訪能否第為三等歲終以聞當行誅賞李士

衡為河北漕真宗幸澶州東封西祀供調百萬億士衡

有功焉士衡為河北都運使調發得策列郡有數年

之積其餘以濟饑民祥符七年詔曰自今轉運副使

不限官品並在提點刑獄之上 咸平元年上謂輔臣  
曰諸路轉運使按察官吏使權甚重必須平允之吏寬  
猛適中卿等其慎擇 四年查道請自今轉運使副得  
替先批書一任曾舉若干廉勤才識之士曾按若干貪  
賊猥濫之人朝廷量其臧否以行賞罰從之 呂文靖  
擢李詢為京西轉運使謂之曰以學士才器高爽故有  
此授宜副朝廷之意 景祐元年令諸路轉運使副察  
所部官吏能否分為三等 景祐間河北河東陝西三

路漕臣賜方勝練鵲錦袍 陳堯佐六為運使方嚴清

肅使人知畏而重犯法 皇祐五年詔轉運之職本以

澄清官吏豈可誅求有能盡歲入以致增盈者留為本

路移用毋得進

美次寶錄

哲宗立復以鮮于侁為京東漕司

謂人曰以侁之賢不宜使居外顧齊魯之區凋弊已甚

須侁為福星救之耳

四朝史

遠採漢官設刺之使近參唐

制考將漕之最

胡文恭

賦輿衍增分輸錯出

同上

往總一方

之刺督之任

張商英

出總舟車之餽餉

徐彥孚

督軍餉朔部

唐義  
問

運管運幹

集以佐輶車

白集

本朝熙寧初詔諸路漕司始置屬官勾當兩負或一負  
又置管勾文字實錄元祐中除三路外並罷後復置建炎  
初避高廟諱改管勾為主管文字勾當為幹辦公事

熙寧中辟唐義問為京西轉運司管當文字神宗因黃  
好謙領使事諭之曰唐義問風力強敏行且用矣可面



詔之四朝史

主管帳司

本朝熙寧五年詔諸路漕司始置屬官元祐罷管勾文

字以帳司兼管後復故

會要

提點刑獄公事

史暴勝之為直指使者衣繡杖斧以出討盜賊

漢書

本朝淳化二年遣官分往諸路提點刑獄尋消之景德  
四年真宗謂王旦曰朕慮四方刑獄官吏未盡得人一

夫受冤即召災沴先帝嘗選朝臣為諸路提點刑獄今  
可復置仍以使臣副之天禧四年改提點刑獄勸農使  
天聖六年悉罷八年復置嘉祐中罷武臣提點刑獄治  
平元年罷提點刑獄而委轉運司職官熙寧二年諸路提  
點刑獄並差文臣十年復置提點京畿刑獄掌察所部  
疑留獄訟勸課農桑而按其官吏之不法別其廉吏以  
達於朝會要宣和初詔廣西江西增置武提刑之員遇關  
帥不許武憲兼攝建炎元年以盜賊未衰諸路無武提

刑處權添差一員專管提刑四年罷之乾道復置武提

刑後又罷之

中興會要

慶厯二年詔自今提點刑獄朝臣代

還列功過三等以聞

續會要

熙寧十年以丁執禮為河北

西路使上諭之曰卿職在刑獄盜賊最急宜用捕督

高賦言國家置提刑司蓋欲平反獄訟使民不冤國

家惟吏之不平民之失職獄之放紛未能獨察也故設

糾度之司使奉欽恤之旨

罷諸路同提點刑獄使臣敕

督視祥獄田侍

問按茲祥刑宜得膚使

蘇諱制

操外憲之柄

胡文恭

讞平狂

獄

林勛制

早稱才名出提憲寄

胡宿集

提刑司幹官

本朝建炎四年詔諸路提刑司除武臣提刑添置幹辦

公事官許存留文臣一員

會要

提刑司檢法

本朝熙寧六年置諸路提刑司檢法一員元豐三年罷

五年復置

四朝史

高賦言自罷武臣以來多止一員兼河

渠盜賊而刑書繁多者閔不給若委之吏則為大弊請

逐路置檢法官以專平讞疏駁

本傳

熙寧八年詔檢法官

今後得隨長官出巡臣寮奏檢法官職專詳讞

會要

### 提舉常平茶鹽司

本朝淳化中建常平倉景祐元年令轉運使司與長吏舉所部官兼領之熙寧遣使提領蓋提舉常平之所始也九年府界亦專置提舉常平倉一員不令司農丞兼領元祐初置紹聖復置政和改元詔江淮荆浙六路其置茶鹽提舉一員宣和三年詔河北京東路推行新

法鹽鈔可添置提舉一員此提舉茶鹽之所始也既而諸路皆置建炎元年詔提舉常平司併歸提刑司二年復三年復詔提刑兼四年詔逐路提刑司茶鹽司四年詔廣西茶鹽司官吏並罷其職事委漕臣五年詔諸路提舉常平併入茶鹽司仍以提舉茶鹽常平等公事為名十五年詔改充提舉常平茶鹽公事等掌常平義倉免役市易坊場河渡水利之法視歲豐歉而為之斂散以惠農民仍專舉刺官吏之事掌摘山煮海之利以佐

國用皆有鈔法視其歲額之登損以詔賞罰且給之不  
如期鬻之不如式與州縣之不加恤者皆劾以聞

慶元制

朕以常平蠲役之政加惠黎元若在神考取成三代  
制為常平蠲役之政以利天下

方畧制

### 提舉司幹官

本朝熙寧三年置提舉常平司勾當公事於通判幕職  
內選差一員不妨本職紹興三年戶部看詳欲諸路州  
並以通判充主管官又許于幕職官選差六年復置主

管官十五年依舊為幹辦公事 此常平幹也宣和三

年置茶鹽提舉屬官一員

並會要

此茶鹽幹也今提舉司

存二幹官以此 使幹茗局

胡文恭

總領

史劉晏移書於元載曰諸將有不庭邊敵有侵盜聞我  
貢輸錯入軍食豐衍可以震耀中外 劉晏領租庸使  
租庸得補署積數百人盡當時之選趣督倚辦故能成  
功 李靈耀反河南節帥擅征賦州縣益削劉晏嘗以



羨補之人不加調而所入自如 贊曰劉晏制萬物低昂操贏貲以佐軍興斂不及民而用度足唐中饋而振晏有勞焉 論曰劉晏幹萬貨盈虛厥功懋矣君子之治財以仁為本以義為利其為利害而寓之法法成矣巧者不敢過拙者不敢不及又曰斂之於官而下不怨藏之百姓而上不乏 元塋判度支國無橫斂而軍旅濟 肅宗駐彭原第五琦謁見陳今之急在兵兵強弱在賦賦所出以江淮為淵若假臣一職請悉東南寶貨

飛餉函洛帝拜為勾當江淮租庸使當軍興隨事趣辦  
人不益賦而國益饒

並唐書

本朝南渡之初嘗命朝臣總領都督府宣撫司財賦未  
以官名也紹興十一年收諸帥之兵以為御前軍屯駐  
諸處皆置總領仍帶專一報發御前軍馬文字蓋與聞  
軍屯不獨職餽餉而已叙位在轉運副使之上鎮江諸  
軍錢糧淮東總領掌之建康池州諸軍錢糧淮西總領  
掌之鄂州荆南江南諸軍錢糧湖廣總領掌之興元興

州金州諸軍錢糧四川總領掌之十六年四川總司以  
總領四川宣撫司錢糧所為名十八年詔罷宣撫司始  
改為四川總領 乾道六年詔淮東總領併歸淮西總  
領所七年復設淮東總領

並會  
要

### 總屬

本朝紹興十一年初置四川總領官屬有幹辦公事準  
備差遣

四川有主管  
文字三員

淮東淮西有分差糧料院審計司

審計司  
通判兼

權貨務都茶場御前封樁甲仗庫大軍倉大軍

庫贍軍酒庫市易抵當庫惠民藥局湖廣有給納場屬官

兼分差糧料院審計司審計以屬官兼御前封樁甲仗庫大軍

倉大軍庫贍軍酒庫四川有分差糧料院審計司審計兼

大軍倉大軍庫撥發船運官贖藥庫糴買場會要

都大提點茶馬

本朝熙寧七年始詔三司鹽鐵判官李杞三司勾當公事蒲宗閔經畫川蜀買茶充秦鳳熙河路博馬就除成都府路買茶公事杞于秦州宗閔于成都置司後改名

都大提舉茶馬事

成都記

元豐四年郭茂恂言茶司既不

兼買馬遂立法以害馬政恐悞國事乞併茶馬為一司

從之掌收摘山之利以佐邦用凡市馬于藩夷以茶易

大觀以采川茶不以博馬唯市珠玉故馬政廢缺紹興

四年始令四川宣撫司支茶博馬五年密院言已于永

康軍茂州置場舊有主管茶馬同提舉茶馬都大提舉

茶馬凡三等乾道元年川秦兩司馬共九千餘匹 熙

寧十年李稷提舉成都府等路茶場熙河市易事手詔

李稷風力固已可任然權勢輕小可依李杞例兼三司判官仍委權限負舉劾官吏初蜀茶額錢三十五萬至稷加至五十萬及陸師閔代稷為百萬李稷言一年通計課利錢七十六萬緡上批云蜀茶變法稷能推原法意日就是切宜速遷擢以勸在官元祐初司馬光為相罷諸路鹽鐵法皆復其舊獨川陝茶以邊用未即罷使相視去其任者紹聖中提舉程之邵以羨茶轉入熙秦市戰騎故馬多而茶息厚之邵革黎州買馬

之弊歲以仲秋為市四月止 元符末程之邵召對徽宗詢以馬政之邵言戎俗食肉飲酪故貴茶而病于難得願禁治邊鬻茶以蜀產易上乘詔可未幾易馬萬匹

並四淳熙五年茶馬吳總以馬政修舉除敷文閣待制

朝志

自紹興初至是踰四十年間以次對為茶馬者趙開及

吳總二人耳

成都記

在昔元豐留神武備摘山市駿具著

科條乃詔攸司悉遵成憲乃將使指實克推行

李昌儒制講

摘山之利得充廢之良

龍溪除起宗制

都大提點坑冶

傳記開元二十五年羅文信充諸道鑄錢使

唐會要

天寶

三載楊睿除御史中丞充鑄錢使六載楊釗充諸道

鑄錢使永泰元年劉晏充東都淮南浙江東西湖南山

南東道鑄錢使第五琦充京畿關內河東劍南山南西

道鑄錢使諸鑄錢監所在州府都督刺史為之副監一

人上佐判之

續通典

本朝開寶置錢監于鄱陽既而江淮荆浙閩廣之地皆



有監係發運使兼提點咸平三年以馮亮為河南轉運

副使兼都大提點江南福建路鑄錢事供奉官白丞霄

同提點鑄錢事

實錄

景祐二年始置江浙荆廣福建等路

都大提點坑冶鑄錢一員與提點刑獄叙官元豐二年

增提點一員定為兩司在饒者領江東浙淮七閩在虔

者領江西荆湖二廣焉

職畧

元祐元年以坑冶鑄錢通為

一司

會要

政和七年置提點鑄錢官兩員于饒虔州紹興

二年置虔州提點司六年銜內添都大二字二十六年

詔都大提點坑冶鑄錢司官吏並罷令逐路轉運司交割二十七年置提領諸路鑄錢官於行在以提領諸路鑄錢所為名二十九年復置官以江淮荆浙福建廣南路提督坑冶鑄錢公事繫銜與運判序官依舊于饒贛二州置司專以措置坑冶督責鼓鑄為職乾道六年併歸發運司七年復置九年兩司分認課額淳熙二年併贛司歸饒州加都大馬掌收山澤之所產及鑄泉貨以給邦國之用歲有定數視其登耗而賞罰之

四朝志朕

修山澤之政令以足國惠民天方降休地不愛寶惟是

興利之廣幅員既長必資能臣以持九路之節

徐謹制

沿

挾銅之令以收七福因採山之法用廣五銖

胡文恭行葛源制

按南州寶冶之饒佐縣官園府之用宣勞于外興利在

公同  
上

### 主管提幹檢踏

本朝紹興二年鑄錢司言本司昨被旨許置幹辦公事

一負檢踏官五負催綱官二負後來與諸司屬官一例

減罷緣所隸諸州不可闕官詔復置幹辦公事一員檢  
踏官三員催綱官一員後檢踏置六員十一年將檢踏  
官各分認專管職事一員在饒州本司一員在信州一  
員在建州一員在韶州一員在潭州二十六年官吏  
並罷二十九年再置提點官於饒州置主管文字贛州  
置幹辦公事一員韶州建州各置檢踏官一員別置秤  
銅官催綱官各一員續詔饒州添檢踏官一員

並中興  
會要

提舉市舶

史嶺南市舶使周慶立造奇器以進柳澤上書曰慶立  
雕製詭物造作奇器用淫巧為珍玩以譎怪為異寶乃  
治國之巨蠹也玄宗稱善 盧鈞開成三年為廣州刺  
史南海有蠻舶之利珍貨輻湊舊帥靡不捆載而還鈞  
性廉潔請監軍領市舶使已一不干預

並唐書

傳記張公為安南習于海邦琛珍良貨溢于玉府至殊  
俗異類盈于藁街

職林

市舶者其利貨擢金山珠海天子

南庫也 百蠻之寶五夫之珍每歲山積

市舶錄

集扶南雜種安西諸國跨險憑危梯山航海飛艎走浪  
望鼠島而三休大舶參雲指麟洲而一息鳶波象郡萬  
舳爭先烏滸狼脰千艘競進

張鷟集

本朝開寶四年以同知廣州潘美尹宗珂並兼市舶使  
通判謝處珙兼市舶判官

實錄

咸平二年令杭州明州各

置市舶聽藩官從便

長編

熙寧變市舶法泉人賈海外者

往復必使東詣廣否則沒其貨哲宗即位之二年始詔  
泉州置市舶舊制市舶司多州郡兼領元豐中始令轉

運司兼提舉而州郡不復預矣後專置提舉而轉運亦不復預矣後盡罷提舉官大觀元年復置建炎中興詔罷兩浙福建市舶司歸轉運司

時政記

而廣南如故明年復

置

中興會要

紹興二年廢福建提舉市舶初令提刑兼領旋

委提舉茶事十二年朝廷措置蠟茶以茶事歸建州而提舉市舶以次復矣乾道三年詔罷兩浙提舉市舶逐處職事委知通知縣監司同行檢視而總其數令轉運司提督均掌蕃貨海舶征權貿易之事所以來遠人通

貨物也

會要

向敏中知廣州兼市舶前後守者多涉讖議

敏中無所求索清節益著

長編

侍御史王絲兼市舶提舉

舊蕃舶之來十稅其一必擇精者絲令粗精兼取蕃人悅之

目為金珠御史

會稽圖記

市舶司言廣州自祖宗以來興置

市舶收課入倍于他路

會要

上曰市舶之利最厚若措置

合宜所得動以百萬計朕所以留意于此庶幾可以少

寬民力耳

又曰市舶之利頗助國用宜循舊法以招

徠遠人阜通貨賄

紹興二十一年李莊除福建提舉



上曰提舉市舶司委寄非輕若用非其人措置失當海商不至矣高祖問張闡舶市歲入幾何闡對抽解與和買以歲計之約入二百萬緡並同上

### 知西外南外宗正司

本朝崇熙元年蔡京乞于兩京置外宗正司當擇宗室之賢者管幹逐處各置一人凡外任宗室事不干州縣者外宗政司受理大觀罷政和復續會要中興外宗司無

定所後南外置司泉州西外置司福州其丞係兼簿係

簽判兼紹興府亦有宗司 乾道七年省紹興宗司隸

行在置四川宗司

會要

宗子有文藝行實衆所共知者許

宗正考實以聞

會要

爰俾訓齊往分糾正

慶元制

睦宗院

本朝崇寧元年蔡京請宗室非袒免親以下兩世除北  
京外欲分于西京近輔或沿流便郡居止自西京為始  
每處置敦宗院差文臣一員武臣一員管幹大觀罷政  
和復

續會要

中興南外居泉州西外居福州光宗改名睦

宗院

北置院于別都

大觀詔

所以親睦宗族愛養孤幼

崇寧

詔

### 宗教

史漢元始五年于郡國置宗師以糾皇室親族世氏致教訓焉選有德義者為之有冤失職者宗師得因郵亭

上書

漢書

晉咸寧三年置宗師使皇室戚屬奉德義有

所施行必合詔之

晉書

唐武德三年詔天下每州置宗師

一人以相統攝

唐書

本朝崇寧初蔡京請置敦宗院又云令置學立師為量試之法大觀元年南敦宗院大學教授張幾以宗子釋褐教養有方特轉一官大觀三年詔曰比置院于別都增學于官邸廩其無祿而教養其未命者累累于茲宗子之在別都或犯朝法吏弗能禁民以為擾師儒之官殆相倍蓰而就學者寡宜有裁適應西京敦宗院官吏並罷政和二年詔曰宗族蕃衍詔有司分食兩京為立廩稍之格由庠序之教朕心無慊焉宣和三年增置西

南司敦宗院教授各一員時又有博士正錄中興後唯

置宗教

會要

都統

史上元初詔郭子儀為諸道兵馬都統領率諸鎮之師

徑抵范陽為朝恩所間事竟不行永泰元年以子儀都

統河南節度使行營出鎮河中

唐書

德宗置六軍統軍秩

視六尚書為節制徊翔之地

乾符中黃巢大掠江淮

宰相王鐸願自率諸軍盪滌羣寇乃拜荆淮南節度使

諸道行營兵馬都統

並同上

傳記晉太元十九年有河西大都統唐天寶末置天下

兵馬元帥都統朔方河東北平盧龍節度使都統之名始

此乾元元年李岷除都統淮南江東西節度使都統

之官始此

唐會要

唐制或總五道或總三道上元末省大中

後討徐州以康承訓討黃巢以王鐸為都統

分黃巢之

難置諸道行營都統掌征伐兵罷則省雖總諸道兵馬

不賜旌節

同上

集宜兼領護之權副師貞之吉

李若幽制

執羈霸府盡忠肅

之勤誠聳劍元戎罄旌旄之茂績

張巡師制

折衝之寄符玉

帳而總金壇

出總戎麾

杜佑制

分委戎輅作鎮孟津

杜牧

行李班冊

授銅符之律

王緒制

執節鈴以涖衆

杜黃裳

主持戎律

削奪陳敬宣官制

權握兵戎

董昌制建牙統衆必藉雄才

劉治制

出

統戎旃

廣平集

來帥熊罷四方作儀

為戎臣師

韓文

本朝南渡諸路起兵有自稱統制者州縣管押勤王兵

亦有稱統制者諸道都總管及諸司便宜差統制者建  
炎初並罷惟中都主兵朝廷差統制者仍舊紹興十一  
年韓世忠張俊岳飛除樞密副使其兵馬就領所部統  
制官節制是年張俊發張憲事併岳飛賜死俊遂薦其  
將田師中掌故岳飛之兵又薦王德住金陵於是並詔  
為御前都統制師中于鄂州德于建康府駐劄

野紀  
按江南

三州都統司  
史無見考

副都統



史唐興元中置副都統

唐書

集自古軍制必有佐貳逮至漢氏亦循舊章既得將方

俾參戎政實資謀策用正紀綱

李德裕

夙以驍騎之鋒累佐元戎之旆

德裕行史憲討制

副旌麾於戎

間

常集辛景宗制

參於戎副

早參戎秩

田承嗣

元帥之任實屬

于師貞佐軍之選諒資于邦傑

李元弼

宜副出車之命仍

踐分麾之寵

翊閫外而專征膺繫閉而受律

並同

本朝紹興中亦有副統制隆興二年詔應諸軍副都統

制並罷乾道三年上謂宰執曰朕欲江上諸軍各置副都統制一員令兼軍事豈惟儲它日統制亦使諸將有所顧忌於是以郭剛為鎮江副都統制張榮為建康副都統制三省樞密院定制云已復置在外副都統制俾贊主帥商議軍事覺察奸弊所有本司文字與都統連銜調發軍馬並聽都統指揮月旦亦許上表

孝宗會要

### 都幹

集參戎作弼

文選楊荊州

昔事前軍幕

古詩

參務戎旂

白集

軍府

之要掌在賓僚

路貫制

班固傳毅之徒皆置於戎幕以典

文章

李文饒

出官府廷乃佐戎幕

韓文

初試佐戎

祭馬

因効

策于戎幕

衛伯玉制

庇身戎幕

文粹

營開楊柳幕展芙蓉

四六集

本朝都統制僚屬有計議官一員主管機宜文字二員

武昌志

### 都總管副總管

史長孫晟為秦州道行軍總管出討突厥有達官來降言突厥大畏長孫總管聞其弓聲可謂霹靂見其走馬

稱為閃電 高祖詔黎州總管徐世勳本自黎陽擁徒  
歸順任以藩岳誠效克彰 張士貴貞觀中為龔州道  
行軍總管太宗以其冒矢石先登勞之曰嘗聞以忠報  
國者不顧身於公見之 李靖為定襄道行軍總管率  
勁騎三千由馬邑趣惡楊嶺頡利可汗大驚太宗曰靖  
以騎三千蹀血敵庭遂取定襄古未有輩 薛萬均為  
沃沮道行軍總管從李靖討吐谷渾斬數千級勇蓋三  
軍 李大亮為河東道大總管出北道與敵遇蜀渾山

大戰破之俘其名王

並唐書

傳記魏黃初始置都督諸州軍事後周改為總管隋文

帝以并益荆揚四州置大總管其餘總管府置于諸州

列為上中下三等加使持節煬帝改帥都督為旅帥唐

諸州復有總管亦加使持節

通典

武德初邊要之地亦置

摘奇

本朝馬步軍都總管以節度使充副總管以觀察以下  
充有止一州者有數州為一路者有帶兩路三路者或

文臣知州則管軍勾馬事舊相重臣亦為都總管咸平廢三路都總管景德詔鎮定兩路併為一路諸路並去行營之名止為駐泊總管慶歷三年詔近分陝西緣邊為四路各置經畧安撫招討等使自今路分總管鈐轄以上許與都總管司同議軍事路分都監以下並聽都總管等節制違者以軍法論七年析河北四路各置都總管一員如無事止以安撫使總制諸路八年諸州部置並改總管軍馬總管副總管分紀建炎元年李綱言守

備當于沿河沿淮沿江置帥府要郡以控扼其帥府文  
臣一員帶安撫使馬步軍都總管武臣一員充副總管  
改路分為副總管紹興二年要郡守臣罷帶兵職諸路  
副總管可依舊充路分鈐轄五年詔兩浙江南荆湖福  
建廣東可依三路置總管于帥府七年淮東置總管十  
二年諸路並置州總管一員會要淳化間以參政趙昌言  
為川陝兩路兵馬都總管命招討蜀寇仍御札數幅授  
以方畧景德以王欽若判天雄軍兼都總管初帝曰

天雄且為重鎮思得熟識機宜行事果斷者蒞之於是

欽若請行

分紀

狄青京師呼為狄天使授涇原路兵馬副

總管令圖像以進上觀其儀表曰朕之關張也於是有

狄萬人之稱天聖七年劉平上封事言趙元昊必為

邊患授邠寧環慶副都總管遣中人就賜黃金一器

景祐四年以御製神武秘畧賜沿邊總管鈐轄熙寧

五年以燕達權發遣環慶路駐泊總管達有戰功故自

鈐轄躡遷然以資淺故令權發遣權發遣自達始也

實錄



總管鈐轄司掌總治軍旅屯戍營防守禦之政令凡符  
兵隸屬者訓練教閱之事皆掌之

續會要

### 都鈐轄鈐轄

本朝國初以朝官及諸司使以上充或一州或一路或  
兩三路嘉祐詔內臣為鈐轄都監者逐路止置一員

分紀

官高資深者稱都鈐轄官卑資淺者稱鈐轄

續會要

建炎

三年要郡守臣兼兵鈐轄以武臣為之副改諸路都監  
為副鈐轄紹興三年守臣罷兼兵職副鈐轄改為路分

都監而帥府如故二十八年鎮江守楊揆言舊法一路分鈐轄一州則有州鈐轄如常秀平江皆有之獨鎮江

闕欲添置州鈐轄從之

中興會要

祥符中涇原路都鈐轄曹

常乞別差人知渭州臣一面管勾鈐轄司事帝謂王欽

若曰邊防軍馬所屯之地若別置知州即各生事可降

詔諭以此意

職畧

曹瑋為環慶路鈐轄帝出其所上涇原

環慶兩道圖以示輔臣曰華戎山川戰守之要盡在是

矣

同賜

御製神武秘畧

治平元年以內侍省押班王昭

明為環慶路鈐轄帶御器械李若愚為涇原路鈐轄前

世以官人預邊事而將帥不盡其用及有是命人不以

為便也後卒罷之

實錄

出總州兵

孔彥舟制

遙剖兵符出鈐尺

籍

胡文恭草童貫詔

往位兵鈐

秦史宣制

就司鈐護

余靖制

參委戎鈐

王興往涖戎政之重

公是劉貽孫制

訓齊軍政宣明國威

柳涉制

### 兵馬都監

本朝兵馬都監有路分掌本路禁旅屯戍邊防訓練之政令以肅清所部建炎三年以要郡守臣帶本路兵馬

都監武臣一員充副都監

中興會要

紹興三年罷守臣兼兵

職而副都監如故

上同

睦典戎之臣

任以護兵

胡文恭

諸路將官

本朝神宗留意武備本以捍西北二敵而推其法于東

南

職畧

陝西諸路四十二將河北東路三十七將而東南

繞十三將淮南東第一西路第二兩浙西路第三東路

第四江南東路第五西路第六荆湖北路第七南路潭

州第八全邵永三州備廣西應援第九福建第十廣東

路第十一西路桂州第十二邕州第十三

實錄

諸路將各

有正副中軍行圖陣隊調發賞罰皆關決于將副

宣和詔

元祐元年司馬光請盡罷諸路將官樞密院難之止詔

都路將副在州駐劄不係路分兵官知州并州鈐轄兼

充者並差將官一員兼本州都監其單將駐劄處勿復

差兼宣和五年御筆諸路將副部隊自今並依元豐法

選差

會要

乾道四年詔諸州各置準備將一員專一管轄

日逐訓練揀中弓弩事藝

孝宗會要

諸路將官掌統制所隸

禁旅以行陣隊伍金鼓旗幟弓矢擊刺之法而教習訓練之別其武藝精強者待次遷補以激勸士卒凡兵仗器甲之數廩祿犒設賞罰約束之禁令皆掌焉副將為之貳續會要熙寧初詔求將帥近臣以劉舜卿名聞命總

京東九郡將兵訓之三年詔以所部軍閱于內殿神宗

歎曰坐作有度其可用也

本傳

王祖道請密下諸路經畧

監司體量將副第人才為三等

職畧

太守

史漢文帝初與郡守為銅虎符竹使符符合乃聽受之

以代古之珪璋

史記

二千石皆皁蓋朱幡

續漢志

季布為河

東守上曰河東吾股肱郡

文翁為蜀郡守起學成都

市至今巴蜀好文雅文翁之化也

汲黯為東海太守

治官理民好清靜黯多病臥閤內不出歲餘東海大治

召信臣為南陽太守興水利吏民信愛號為召父

武帝謂朱買臣曰衣錦還鄉遂除會稽太守宣帝時

渤海歲饑盜起上選能治者以龔遂為渤海太守召見

謂曰君欲何以息其盜賊對曰海瀕遐遠不霑聖化其民困於饑寒而吏不恤故使陛下赤子盜弄兵于潢池中耳今欲使臣勝之耶將安之也上曰選用賢良固欲安之遂曰治亂民猶治亂繩不可急也願得便宜從事上許焉至渤海悉罷捕逐盜賊吏諸持田器者皆為良民吏毋得問持兵器者乃為盜賊遂單車獨行至府盜賊即時解散乃開倉廩假貧民勸民務農桑民有帶刀劍者使賣劍買牛賣刀買犢曰何為帶牛佩犢黃霸



為潁川太守布宣詔令勸務耕桑嘗欲有所伺察擇吏遣行屬令周密吏出食于道旁烏攫其肉後還謁霸勞之曰甚苦食于道旁乃為烏所盜肉吏大驚咸稱神明霸外寬內明得吏民心戶口歲增治為天下第一韓延壽為東郡太守斷獄大減為天下最入守左馮翊民有昆弟相與訟田延壽傷之曰幸得備位為郡表率不能宣明教化至令民有骨肉爭訟傷殘風化是日移病不聽事於是昆弟遜謝不敢復爭延壽恩信周徧二十四

縣莫復以辭訟自言者 嚴延年為河南太守號曰屠  
伯延年母從東海來適見報因大驚遂不肯入府延年  
出謁母因數責延年曰幸得備郡守專治千里不聞仁  
愛教化顧乘刑罰多殺人豈為民父母意哉 朱邑遷  
北海太守以治為天下第一 尹翁歸拜東海太守東  
海豪許仲孫為姦猾郡中苦之翁歸至論仲孫棄市一  
郡股栗莫敢犯禁 何武為兗州刺史徙京兆所居無  
赫赫名去後常見思 蕭望之子育為南郡太守上以

育者舊名臣之子乃以三公使車載育入殿守

並前漢本傳

光武定河內難其守鄧禹曰寇恂有牧人御衆之才乃拜恂河內太守 潁川盜賊羣起車駕南征恂從至潁川盜賊悉降百姓遮道曰願從陛下復借寇君一年

杜詩為南陽太守性節儉而政治清平南陽為之語曰前有召父後有杜母 潁川盜起召郭伋拜潁川太守帝勞曰賢能太守去帝城下遠河潤九里冀京師蒙福郭伋在并州素結恩德及復入界童兒數百騎竹馬

迎于道路 張堪拜漁陽太守開稻田八十餘頃百姓  
歌之曰桑無附枝麥秀兩岐張君為政樂不可支侯霸  
為臨淮太守被召百姓攀轅臥轍 岑熙遷魏郡太守  
無為而化輿人歌之曰我有枳棘岑君伐之我有蠹賊  
岑君遏之狗吠不驚足下生菴 鮑德為南陽太守號  
為神父 宋均為九江太守郡多暴虎常設檻穽均至  
去檻穽虎相為東渡河而去 廉范遷蜀郡太守舊制  
禁民夜作以防火災范乃削先令百姓歌曰廉叔度來

何暮不禁火民安作昔無襦今五袴 劉寬拜南陽太

守溫仁多恕吏人有過但以蒲鞭撻之示辱而已 朱

暉為臨淮太守吏人歌曰強直自遂南陽朱季吏畏其

威民服其惠 劉寵為會稽太守召為將作匠山陰老

叟人齎百錢以送曰自明府下車狗不夜吠民不見吏

今聞棄去故自扶送寵為人選一大錢受之 孟嘗遷

合浦太守郡不產穀而海出珠與交趾常通商販貨糴

糧先守多貪穢珠漸徙于交趾界商旅不至嘗革商前

弊求民利病未經歲珠復還稱為神明 李元禮祖父

修生子亮叔訓秀號四龍俱為牧守 劉昆前任江陵

反風滅火復守弘農虎北渡河 楊震為東萊太守故

人王密懷金遺之曰暮夜無知者曰天知神知子知我

知密愧而出楊震為涿郡太守或勸開產業震曰使後

世稱為清白吏子孫以此遺之不亦可乎 陳蕃為豫

章太守不接賓客唯徐穉來特設一榻去則懸之

並後漢

王行為青州弟澄為荊州弟敦謂衍曰荆有江漢之

固青有附海之險卿二人在外而吾留于此足以為三

窟矣 劉宏為荊州刺史每手書郡國丁寧疑密咸曰

將劉公一尺書賢於十部從事

並晉書

顏延之為永嘉太

守甚怨憤作五君詠於阮咸曰屢薦不入朝一麾乃出

守

南史

周太祖除裴俠為河北郡守命俠立謂牧守曰俠

清謹奉公為天下最衆有如俠者可與俱立衆無應者

朝野號獨立使君

北史

姜墓以平薛仁果拜秦州刺史高

祖曰衣錦還鄉古人所尚今以本州相授

唐書

陽城為道

州刺史觀察使當上考功第城自署曰撫字心勞催科  
政拙考下下姚元崇牧荊州受代民擁馬首遮道不  
肯去乘馬鞭鞅民皆截留之賈敦頤為洛州刺史百  
姓共立碑及弟敦實為長史復刻石頌美於兄碑之側  
時人號為棠棣碑袁滋為華州刺史召拜大將軍者  
老遮道不得進楊於陵代之宣言曰於陵不敢易袁公  
之政李正己反德宗以張萬福為濠州刺史謂曰朕  
以江淮草木知卿威名陸長源為汝州刺史清白自



將去汝州送車二乘曰吾祖罷魏州有車一乘而圖書

半之吾愧不及先人云

並同

後唐長興元年給事中崔

衍奏當省給納諸州二銅魚一隻長留內庫一在本州

庫新除刺史請領左魚到州集官吏取州庫右魚契合

即遣差人送左魚納省

五代史

傳記郡守秦官秩二千石漢景帝更名太守王莽改名  
大尹晉郡守皆加將軍後魏初郡置三太守北齊制郡  
為上中下三等後周郡太守各以戶多少定品命隋因

北齊九等之制唐武德改為州刺史加號持節天寶改為郡太守開元中定天下州府自京都及都督護府之外以近畿為四輔餘為六雄十望十緊及上中下之差至德後諸州始各有州鎮刺史皆加團練使故其任重

矣  
通典

集今之郡守縣令民之師帥所使承流而宣化也

董古策

者參用名儒典領大郡本經術以濟事參禮法以訓人居一州之表為千里之師 潁川有封侯之賞膠東有

璽書之勞

常集

賈琮以最于十二州頒之以璽書黃霸以

用于二千石寵之以侯印

韋處原對策

今之郡守古侯伯也於

吏有君臣之道焉於人有父母之道焉

白集

得不思勤儉

教導勞來安輯膏雨吾土襦袴吾人者乎

楊潛制

于時州

宰高季通秩映隼旗榮參熊軾

徐游藝碑

州將李憬閔河承

寄以廉能居課最之先

顏元孫制

丈夫官至刺史亦榮矣

韓文

斂此大惠施于一方無疾其驅天子有詔歲會課第

甲於他州

白集

亟分符宇

于頔制

俾從竹使之權

王博制

惠露

霑吳仁風扇越

昭王碑

寵冠列藩越數邦教

褚淵碑

廊廟之

具裴施州宿昔一逢無比流金鐘大鏞在東序冰壺玉

衡懸清秋堯有四岳明至理漢二千石真分憂

杜甫寄裴施州

人生五馬貴莫受二毛侵

送賈汝州

京兆先時傑琳琅照一

門

送鮮于萬州

東藩駐阜蓋

李邕宴

使君騎紫馬捧擁從西來

與張留後

酒酣誇新尹蓄眼未見有感此氣揚揚須知風化

首

遭田父泥飲美嚴中丞

清高金莖露正直朱絲絃昔在堯四岳

今之黃潁川

贈李勉

幾分漢庭竹

贈李邕

刺史諸侯貴郎官

列宿應

寄劉峽卿

卿月昇金掌王春度玉墀

送馬大卿

分符先令

望同舍亦輝光

送韋負外

鵬圖仍矯翼熊軾且移輪

贈蕭北使君

風隨爽氣南斗避文星

送季大夫

燕寢凝清香兵衛森畫戟

韋蘇州

文石陞前辭聖主碧雲天外作冥鴻

杜牧

駕鷺差池

出建章綵旗朱戶鬱相望新恩共理犬牙地昨日同舍

雞舌香

劉禹錫

本朝分命朝臣出守列郡號權知軍州事軍謂兵州謂

民政焉

職畧

其後文武官參為知軍州事二品以上及帶

中書樞密院宣徽使職事稱判會要太守掌總理郡政宣

布教條導民以善而糾其姦慝歲時勸課農桑旌別考

第其賦役錢穀獄訟之事兵民之政皆總焉察郡吏德

義材能而保任之若疲軟不任事或姦貪冒法則按劾

以聞遇水旱以法賑濟安集流亡無使失所四朝志建炎

詔要郡帶本路兵馬鈐轄次要郡帶本路兵馬都監紹

興三年罷五年令郡守除授罷任並令上殿九年令郡

守並帶提舉學士乾道二年令不任守臣不為郎淳熙

中罷帶主管學士

中興會要

張中庸知漳州民號為水晶燈

籠

分紀

淳化中何承矩知滄州徙雄州賜御書印紙錄其

課最仍賜內府弓劍

同上

王祐知大名太祖謂曰此卿之

故鄉所謂畫錦者也

職畧

太宗謂宰相曰刺史之任最為

親切非其人則下受其弊杜衍知乾州命攝治鳳翔

二州之民爭于境上乾之民曰天子令杜公撫我彼州

之民何可得之鳳翔之民曰今為我公矣汝何有焉

並同

上分握符書臨長藩服

胡文恭制

畫鳳仙瀛遠塗雄郡閣開

注云塗雄用黃堂事也平江州治因春申君故居塗以

雄黃故曰黃堂

送王滁  
州詩

沿邊太守

史李廣為上谷太守數與匈奴戰材氣天下無雙李

廣為右北平太守匈奴號曰飛將軍也避之數歲不入

界郅都為鴈門太守匈奴素聞其節竟都死不近鴈

門匈奴至為木偶人像都令共射之莫能中其見憚如

此魏尚守雲中匈奴遠避不敢近塞

並漢書

崔寔為五



原太守敵不敢犯常為邊最廉范為雲中太守匈奴

不敢犯雲中

祭彤為遼東太守邊境肅靜

並後漢

士燮

為交趾太守二十餘年疆場無事

吳志

羊祜都督荊州朝

廷委以方鎮之事祜招攜以禮懷遠以德吳人悅

東晉書

李勣治并州太宗曰煬帝不擇人守邊勞中國築長城

以備敵今我用勣守并賢長城遠矣

唐書

傳記桓階為趙郡太守上曰北邊未靖以卿威能震敵

德懷遠人故以相煩

漢紀

集西川曰益部地有險府有兵礙戎屏華號為難理

白集

本朝沿邊州郡或當一道衝要者並兼兵馬鈐轄巡檢都監或帶沿邊安撫提轄兵甲沿邊溪谷都巡檢餘州

事則否

職畧

治平三年陸說知延州入見上問當何以施

為對曰邊事不可遙度候臣到察審有所見當畫一條

奏蔡挺在渭久鬱鬱不自聊寓意樂府詞有玉關人

老之歎中使至則使倡優歌之達于禁掖天子愍焉遂

有樞府之拜

四朝史

出總邊瑣

公是行陳旭制

通判

史黃霸為刺史詔賜車蓋高一丈別駕車緹油屏泥于

軾前以彰有德

漢書

周景辟陳蕃為別駕蕃不就景題駕

輿曰陳仲舉坐不復更辟蕃起就職趙溫為京兆郎

丞嘆曰丈夫當雄飛不當雌伏

後漢書

龐統守荊陽令不

治免官魯肅遺先主書曰龐士元非百里之才使處治

中別駕之任始當展其驥足耳

蜀志

呂虔有佩刀工相之

以為必登三公可服此刀虔語別駕王祥曰苟非其人

刀或有害卿有公輔之量故以相與 王祥為徐州別  
駕糾合義衆州境獲寧人歌之曰海沂之康實賴王祥  
邦國不空別駕之功 桓溫辟謝奕為安西司馬奕在  
溫坐岸幘談詠曰我方為司馬也 習鑿齒吏才不常

桓溫深器之用為荊州治中別駕謝朓曰不遇明公荊  
州從事耳 庾亮與郭游書曰別駕舊與刺史同乘流

王化于萬里之外任居刺史之半安可非其人

並晉書

趙

執

別本作張執

為齊州別駕有能名詔徵入朝父老揮涕隨

逐曰公清如水請酌一盃水奉餞執受飲之

隋書

孔昌寓

貞觀中對策高第歷魏州司馬帝為不置刺史為政三

年璽書褒美

唐書

崔神慶則天時擢拜并州長史因謂之

曰并州朕之枌榆又有軍馬比日簡擇無如卿者武

后求宰相狄仁傑曰荊州長史張柬之其人雖老宰相

才也堂吏朱儉為別駕給事中蕭倣駁曰別駕古為

治中從事任居刺史之半豈宜以人吏兼副政之名

大歷十二年制曰刺史有故及闕本道使不得差攝但

令上佐知州事

姚崇為揚州長史政條簡肅人為紀

德于碑

並同上

傳記秦置郡丞以佐守在邊為長史掌兵馬漢因之于  
定國條州大小為設吏負治中別駕諸郡從事秩六百  
石晉因之而省郡丞宋梁以下如之至隋改別駕治中  
為長史司馬煬帝罷之而置郡贊治後又改為丞位在  
通守下至唐而郡丞廢矣有長史有別駕別駕以皇族  
為之開元始通用庶姓以貳都督刺史之職

通漢制從  
典

事史一人從刺史行部別乘一乘故謂之別駕孔恂  
為別駕別駕車舊有屏星如刺史車刺史怒欲去之恂  
曰撤去屏星毀國舊儀別駕可去屏星不可去 蕭邁  
貶播州司馬道二峽方迫畏不瞑遽有神人曰相公勿  
憂予為公禦侮邁異之過峽州經白帝祠即所見神人  
也  
同上

集江州土高氣清富有佳境刺史守土不遠觀遊郡吏  
執事不自暇佚惟司馬綽綽可以從容于山水詩酒間

於是郡南樓山北樓水涵亭百花亭風篁石岩瀑布廬  
宮源潭洞東西二林寺泉石松雪司馬盡有之矣苟有  
志于吏隱者捨此官何求焉貳藩有職方題別駕

與贊郡符才優佐郡大邦端佐

並白集

半刺上佐得

與二千石參校政事短長利病者也

杜牧行馬迴制

通倅之官

朱廣平集通理方州

題政佐岳無轉驥之能

子昂代表

半刺已

翱翔杜詩

爽氣金天豁清談玉露搏佇鳴南岳鳳欲化北

冥鷗

贈虞司馬

案牘來時惟署字風煙入興便成章

劉禹錫



本朝藝祖懲五代藩鎮之弊始置諸州通判建隆四年  
詔知府公事並須長史通判僉議連書方許行下時大  
郡置兩貲餘置一貲州不及萬戶不置正刺史以上及  
諸司副使知州者雖小郡亦特置掌倅貳郡政與長史  
均禮凡兵民錢穀戶口賦稅獄訟聽斷之事可否裁決  
與守通簽所部官有善否得刺舉以聞四朝志宣和二年  
詔諸州茶鹽香礬並委通判建炎初諸州通判二貲  
處減一貲紹興以後施行申請添置會要國初設通判以

貳州事故常與知州爭權每聞我是監郡朝廷使我來  
監汝舉動為其所制有錢昆者餘杭人嗜蟹嘗求補外  
郡人問其所欲昆曰但得有螃蟹無通判處則可至今  
以為口實歸田錄知成都廣益奏云州郡置倅所以佐郡

守之治入則貳政

出則按縣

中興會要

分乘倅車

文恭制

分駕

別車

世南制

分倅州治

陳湜制

欲問君王乞符竹但憂無蟹

有監州

坡詩

教授

經師嚴然後道尊禮記善待問者如撞鍾叩之以小則小

鳴叩之以大則大鳴待其從容然後盡其聲同上

史漢郡國有文學文翁起學成都市招下學子弟以為學官弟子武帝時天下郡國皆立學設教官平帝時

郡國曰學侯國曰校置經師一人鄉曰庠聚曰序置孝

經師一人匡衡補平原文學學者多衡經明當世少雙

並漢書光武問武臣曰請卿自度爵祿何所至也鄧禹曰

臣少嘗學問可郡文學同上

傳記魏晉以下郡國並有文學即博士助教之任六隋典

潘徽為博士唐府郡置經學士各一人掌以五經教授

開元二十六年敕州縣置學仍擇師資令其教授

職源

集諸公衮衮登臺省廣文先生官獨冷甲第紛紛譽梁

肉廣文先生飯不足

杜詩

本朝慶厯四年詔諸路州軍監各令立學又置教授以  
經術行藝訓導諸生掌其課試之事而糾正不如規者  
當時或用兼官或舉士人委于曹司而未隸朝廷也熙

寧六年詔諸路學官並委中書門下選差至是始命於

朝廷矣

會要

建炎教授並罷紹興復置四十二州若試教

官則始于元豐添差教授則始于政和慶厯三年臣

察言本朝學校興矣未嘗設官在泮采芹典教以重其

任崇寧四年令教授承務郎以上在本州簽判上選

人在本州職官之上政和五年臣察言見任教授不得

為人撰書啓簡牘樂語之類鄒浩調陽州潁昌府教

授呂公著范純仁為守獨加禮重純仁常屬撰樂語辭

不為純仁曰翰林學士亦作此浩曰翰林學士則可祭酒司業則不可

四朝史

任諒為懷州教授徽宗見其所作

新學碑曰文士也擢提舉夔路學事紹興十三年宋

宙奏乞盡復教官上曰教授須逐州置仍須是擇通經

心術正者為之若教官非其人士人心術一壞再整頓

費力切宜遴選也宗子師閔訟臨安教授鮑同上曰

為教授者須先正已然後可以率人十八年上曰選官

教導乃治化本源將來三場科舉亦有人才以備采擇

十八年詔諸州教授並不許差兼他職 教授之為  
職可謂難矣何也曰教授者以天子之命教其邦人凡  
邦之士廩食縣官而充弟子貲者多至五六百餘少不  
下百十數皆惟教授者是師其必有以率厲化服之使  
躬問學蹈繩矩出入不悖所聞然後為稱是可不為難  
矣哉又先聖先師之典祀廟學圖書服器之藏其體至  
重下至金穀出內之纖悉亦皆獨任之嗚呼是誠難矣  
然凡仕於今者無大小莫不有所臨制統攝獨教授官

雖有統攝若其任之本諸身者則非簿書期會之所能  
察至其具於有司而可考者上之人又以其儒官優容  
之雖有不合不問以是為便故今之仕者反利焉而喜  
為之而孰知所以充其任者如彼其難哉

朱文公序



記纂淵海卷三十四



欽定四庫全書

子部

記纂淵海卷三十五

詳校官中書<sub>臣</sub>涂日煥

侍讀<sub>臣</sub>孫球覆勘

總校官降調編修<sub>臣</sub>倉聖脉

校對官中書<sub>臣</sub>陸湘

謄錄監生<sub>臣</sub>沈希曾

欽定四庫全書

記纂淵海卷三十五

宋 潘自牧 撰

職官部

幕官

之枚乘為大國上賓與英俊並游漢書虞翻會稽人太守

王朗會接以交友之禮魏志陶侃鎮武昌軍殷浩庾翼等

皆為佐史時武昌號為多士晉書謝安王坦之嘗詣桓溫

論事溫令郗超帳中臥聽之風動帳開安笑曰郗生可

謂入幕之賓矣同上王儉用庾杲之為衛將軍長史蕭緬

與儉書曰盛府元僚實難其選庾景行泛綠水依芙蓉何

其麗也時人以入儉府為蓮花池故緬書美之南史王子

猷為桓溫車騎參軍溫謂曰卿在府久此當相料理初

不答以手板拄頤云西山朝來有爽氣晉書郭子儀幕府

六十餘人皆為將相顯官李藩在徐州辟為從事居

幕中謙謙未嘗論細微劉三復長於章奏李德裕期

待之鎮浙西及畿甸皆參佐賓筵崔衍為宣歙池觀

察使其所擇從事皆得名流 劉蕡對策極言中官權

盛令狐楚牛僧孺辟為從事待如師友權德輿未冠以

文章稱韓洄李兼杜佑裴胄交辟之

唐書

傳記李逢吉始從事振武日金城寺僧忽見一人介冑

持斧由門而入俄聞報李判官來僧具以告自是逢吉

每造其室即見其人先至率以為常故逢吉出入將相

二十餘年

廣記

集翹車著詠戔帛垂文式重弓旌以光樽俎允奉幕中

之畫以稱席上之珍

乾祐勅

烏重胤鎮河陽之三月以石

生為才以禮為羅羅而致之幕下未數月也以溫生為

才於是以石生為媒以禮為羅又羅而致之幕下東都

雖信多才士朝取一人焉拔其尤暮取一人焉拔其尤

送溫造序

忽騎將軍馬自號報恩子風雲入壯懷泉石別幽

耳

送石處士赴河陽幕

從軍古云樂談笑青油幕

郾城夜會

城上赤烏

呈瑞氣眉間黃色見歸期幕中無事惟須飲即是連鑣

向關時

韓愈

歸路芙蓉府離堂玳瑁筵

劉禹錫送陸侍郎

安西幕

府多才雄喧喧惟道三數公繡衣貂裘明積雪飛書走

檄如飄風

李白

數論封內事揮發府中趨

杜詩

直道事人男

子事異鄉加飯弟兄心還須整頓韋絃佩莫獨吟誇玳

瑁簪

杜牧送弟題

文苑臺中妙冰壺幕下清

韋應物

本朝晏元獻延賓客一時名士多出其門為西京留守

幕下士王琪張亢最為上客

分紀

### 簽判

史唐令狐楚辟為太原從事自書記至節度判官才思

清麗每太原奏至德宗能辨楚之所為 武元衡節度  
劍南柳公綽裴度俱為判官 鄭從諫為河東節度表  
王調劉崇龜趙崇李渥崔澤等為判官書記支使皆一

時選

唐書

本朝有兩使防團軍事推判官皆以選人充太平興國  
中以贊善大夫十五員充諸州節度判官

以王化基韋  
亶武元穎等

為之且令綿歷觀  
其佐治之才也

蓋太宗以諸州戎幕缺官選朝士補之

俾分理事且試其才能此簽判所由始也蓋選人則為

判官京官則為簽判或謂簽書判官之名不正政和初

改為司錄建炎復舊

職源

簽盛府之元僚

胡文恭行周詢制

### 推官判官

史大厯中東都留守楊再思王方慶共引徐堅為判官  
方慶學禮常就堅釋疑晦堅屬文典厚再思每目為鳳  
閣舍人樣李瓊鎮桂管奏柳璧為判官軍政不愜璧  
極言不納拂衣而去狄仁傑孫兼謨元和末解褐襄  
陽推官言行剛直使府知名韓退之為武寧張建封



府推操行堅正鯁言無所忌 裴度東都留守辟皇甫  
湜為判官度脩福先寺求碑文於白居易湜怒曰近舍  
湜而遠取居易請從此辭度謝之湜援筆立就度曰不

羈之才也 崔造與韓會盧東美張正則三人友善皆

自謂王佐才故號四夔浙西觀察李栖楚辟為判官

唐書

後唐長興詔推判官各限年任惟績效拔異文學超邁

擢任不限年

五代史

傳記唐天寶後有判官之名後唐長興二年始有兩使

判官防團推官軍事判官等是時判官多本州自辟舉

清泰中始擇朝士用之

職源

張建封奏李藩為判官有新

羅僧能相人李判官至僧降階迎曰判官是紗籠中人

宰相冥司必以紗籠護之恐為異物所擾也

互見宰相類

集今之俊又先辟為征鎮次升於朝廷故幕府之選下

臺閣一等異日入為大夫公卿者十八九焉千里之

行始於足下苟自強不息亦何遠而不屆哉

溫堯卿制

學業

才畫堪置幄中

李石等制

佐相幕府

孫簡制

藩隅之重委以侯

伯軍府之要掌在賓僚佐廉問澄清之務撫華夷錯雜

之人俾其又安實在參贊

路費制並白集

以佐賓幕

杜牧行馮軒制

運

籌盛府言必端詳

出保傅之重鎮之以屏王室擇賓

從之賢佐之以齊政經

俾陟賓階奉我元老

徐騎省集

樽

前失詩流塞上得國寶

送長孫判官

生知七曜歷手畫三軍勢

冰雪淨聰明雷霆走精銳幕屬輟諫官朝廷無此例

送樊

侍御為判官

吾聞駕鼓車不合用騏驎

送從弟亞

珊瑚市則無騏

驎人得有早年具標格秀氣衝牛斗

贈判官

入幕未展才

秉鈞孰為偶

崆峒使節上清霄

杜甫

將取離魂隨白騎

三台星裡拜文星

送斛斯判官

燕臺上客意何如

寄浙西李判官

處

士聞名早遊秦獻疏回腹中書萬卷身外酒千杯江雨

春波濶園林客夢催今君拜旌戟凜凜近霜臺

杜牧

本朝兩使置判官推官各一人餘州置推判官各一人

政和初自判官至諸曹改為士戶儀兵刑工曹掾建炎

復舊

職源

結綬賓筵

夏英公除李象之制

豫籌幕府

胡文恭行朱遠制

擢參

賓謀

陸起等制

書記支使

史魏陳琳阮瑀並為管書記室太祖先苦頭風臥讀琳

所作檄頭風頓愈又太祖適近出瑀於馬上具草書成

太祖覽畢欲有所定竟不能增損

魏志

梁建王以江革為

征北記室參軍弟觀兼書記沈約任昉與革書曰雍州

妙選英才文房之職總卿兄弟可謂駕二龍於長途騁

騏驎於千里

梁書

陳武帝引趙知禮為書記為文甚速每

占受軍書下筆便就

南史

韋陟奏常元甫充支使元甫有

器局精於簡牘所蒞有聲裴度表舒元興掌書記文  
檄豪健一時推許文宗謂侍臣曰近日諸侯奏語太  
浮華有過典實宜罰掌書以戒其流李石曰古人因事  
為文今人以文害事牛僧孺鎮揚州辟杜牧為節度  
府書記數年召拜侍御史僧孺餞之曰以侍御史風槩  
遠馭固當自極夷塗李商隱能為古文不喜對偶始  
為今體章奏博學強記下筆不能自制

唐書

傳記書記支使自魏以來有其名陳有文房書記之任

唐景龍中元帥府置掌書記一人節度使亦置焉掌朝

覲聘問慰薦祭祀祈祝之文與號令陞黜之事後唐長

興中有書記支使

職源

蕭穎士止陳留逆旅有一老人目

之曰君一似鄱陽王蕭驚問老人曰某姓左昔為鄱

陽書佐

同安志

集書記之任亦難矣元戎總齊三軍之事統理所部之

毗以鎮定邦國贊天子施教化凡文辭之事皆出書記

非閔辨通敏兼人之才莫宜居之志同而氣合魚川

泳而鳥雲飛樂是賓主之相得也 儀之智足以造謀

才足以立事忠足以勤上惠足以存下而又侈之以詩

書六藝之學先聖賢之德言以成其文以輔其質宜乎

從事於是府而流聲實於天朝也

韓文

夫幕使之道有事

必言知無不為

杜牧行  
韋瓊制

續漢百官制三公大將軍皆有

記室主上表章報書記雖列於上宰之庭然本為從事

之職 揚雄稱軍旅之際飛書馳檄用枚臯 非天機

殊健學源濬發含思而九流委輸揮毫而萬象駿奔如



庖丁提刀為之滿志師文鼓瑟效不可窮則不能稱是  
職也 其簡才之用亦金馬石渠之亞 僕射高貞公

節度令狐公以人文掌宸翰國子司業鄭公給事河南

尹杜公以才華登貴仕繼斯躅者不亦盛歟

李文  
饒集

軍旅

之事不可無佐奏記之任不可非才

侯藩載筆

徐騎  
省集

書記赴三捷公車留二年

杜詩

本朝乾德二年詔立兩任有文學者許兩使留後奏充  
掌書記太平興國六年詔諸節度州依舊置觀察支使

一負凡書記支使不得並置有出身曰書記無出身曰

支使

會以幹力參幕書

公是行趙

參畫之筵

胡文恭行

要

庶明制

蘇澄制

### 錄事參軍

史杜景佺性嚴正為益州錄事逆折房司馬之不視事

吏歌之曰錄事意與天通州司馬折威風由是寢知名

裴漼為陝府錄事李勉除觀察召漼曰素聞公名朝

中親友話公美事請置在賓席顏杲卿為魏府錄事

振舉綱目政稱第一

唐書

傳記後漢有郡主簿官在漢魏間及江左為督郵主簿  
掌總錄衆曹文簿舉彈善惡後魏洎隋皆有錄事參軍  
煬帝置郡有東西曹掾及主簿唐武德復為錄事參軍  
開元改司錄參軍掌正違失蒞符印後唐應順間州置  
錄事參軍

職源

道州錄參王沼與楊炎有微恩及炎入相

舉沼拜監察御史始減公議

南部新書

喬琳歷果綿遂懷四

州刺史嘗謂錄事參軍任紹業曰子綱紀一州能劾刺  
史乎紹業出條所失示之驚曰能知吾失御史才也

分紀

孫邵為孔融功曹融曰廊廟才也後為吳相錄錄事參

軍務舉善彈非

書抄

督郵郡之極位

漢官儀

大和七年中書

門下奏錄事參軍糾察屬縣課責下僚一郡紀綱藉其

提舉

續通典

掌總錄衆曹管其文案自上佐法意違失者

彈正以法掌凡諸司察之事

平寶司徒儀司

集君為京兆司錄諸曹白事不敢平面視揖起趨去無

敢間語縣令丞尉如嚴京兆事以幹治 公為京兆府

司錄與一府政 故相崔圓尤狎愛州民丁某至親省

其家後大衙會日司錄君趨以前日請舉公過公與小

民狎至其家害於政圖驚謝乃自罰

韓文

君轉隴州錄參

時劉仁軌以宰相之貴持節此州坐帷中主諾責下君

提綱未幾羣輅載孚劉公坐嘯以為能也

陳子昂集王符君志

往

參都錄雅有能名宜列府聯之職俾展官常之效

紀綱大府利可折滯明可照奸常集為樞為相何莫由

斯權集

向事主符實司綱紀

徐騎省集

操持紀綱地喜見朱絲

直

杜詩

本朝諸府為司錄諸州為錄事不盡置也乾興元年諸

州始各置錄事參軍慶歷二年河西河東陝西諸州權

令京官知錄事參軍會要政和三年尚書省言參軍之稱

起於行軍之際恐不當龍襲奉聖旨參軍改為掾職畧建炎

復舊掌州縣庶務糾諸曹稽違中興會要元符中陳察乞監

司歲舉明謹端慤善治獄充錄事政和尚書省言錄

參充近上曹官續會要任紀綱於州事胡文恭行擢從州

簿唐節制馴致州綱張日表率諸曹樊克督郵綱掾之峻

閤仲  
宣制

司理參軍

本朝五代以來諸州皆有馬步獄以牙校充馬步都虞  
候掌刑法謂之馬步院太祖慮其任私高下其手開寶  
六年始置諸州司寇參軍後改為司理掌獄訟勘鞠之  
事職源國朝別置以專鞠獄事劇者置二人太平興國九

年詔曰司理參軍專於推鞠研覈情實尤在得人宜令  
本州於見任簿尉判司內選明敏有官業者充

分雍熙

詔不得與帑藏之事自端拱淳化以來皆上躬自選擇  
仍詔掠囚皆依律令 祥符五年薛顏請自今司理誤  
入人徒已上罪者令批歷依例守選庶有所懲職鮮于  
侁為江陵右司理慶歷旱求言侁條當世之失有四其  
語切直唐介稱其名於上官交章乞薦侁盛言左參軍  
李景陽之美乞移與之介益以為賢四朝史

司戶參軍

史張元素仕隋為景城縣戶曹竇建德陷景城將殺之



邑人千餘請代曰此清吏殺之是無天也 李素立高  
祖令授七品清要官所司擬雍州司戶上曰此官要而  
不清 裴琰之為同州司戶年少刺史李崇義輕之州  
中積年舊案數百道崇義促琰之判琰之命書吏數人  
連紙筆須臾剖判盡畢由是大知名謂之霹靂手 李  
元紘遷雍州司戶時太平公主與僧爭碾磑元紘判還  
僧寺長史竇懷貞促令改判元紘大署判後曰南山可  
移此判終無搖動

唐書

傳記曹羣也戶曹民所羣聚

釋名

漢魏以下有戶曹掾主

民戶北齊以下與功曹同隋有戶曹參軍文帝時為司

戶參軍煬帝為司戶書佐唐開元復為戶曹參軍掌戶

口籍帳婚姻田宅雜徭道路之事梁開平省六曹掾屬

留戶曹一員通判六曹

通典及分紀

王宗銖謫授雍州司戶

參軍問吏曰參軍何官衣何衣吏曰下州判司綠衫槐

笏而已宗銖大笑曰若頭更斬去吾何能作措大官耶

九國

志

集祠曹賦籍之要司

以三語自試

白侍郎集

本朝掌戶籍賦稅倉庫受納

職畧

乾道六年汪大猷乞令

司戶專主倉庫

中興會要

司法參軍

史張湯以倪寬為奏讞掾以古義決獄

漢書

郭洪為潁川

郡決曹掾治獄四十年用法平正郡內比之東海于公

後漢書

韋仁壽大業末為蜀郡司法書佐斷獄平恕得罪

者曰韋君所斷罪死而無悔

隋書

狄仁傑為并州法曹親

在河陽仁傑登太行山及見白雲孤飛謂左右曰吾親  
舍其下 藺仁基曰狄公之賢北斗以南一人而已

鄭從質母老當使絕域仁傑謂曰太夫人有危病而公  
遠使豈可貽親萬里之憂乃請代行 徐有功累轉蒲

州司法不行杖罰吏人感其恩信遞相約曰若犯司法  
徐參軍杖者必斥罰之終於代滿不戮一人 顏杲卿

為遂州司法性剛正蒞事明濟嘗為刺史詰讓正色別

白不為屈

唐書

傳記兩漢有決曹賊曹掾主刑法歷代皆有唐掌律令

定罪盜賊之事

職源

集公為京兆法曹日伏階下與大尹爭是非大尹屢詘

已見 惟是鄙鈍不通曉於時事學成而道益窮年老

而身益困 棲身法曹掾何處事卑陬 州家申明使

家抑坎軻祇得移荆蠻判司馬官不堪說未免捶楚塵

埃間 法曹貧賤眾所易腰腹空大何能為

韓愈文集

官決

平之司無舞文之過

杜牧行楊元汝制

本朝掌議法斷刑紹興三年罷後復舊

中興會要

賈易調常

州司法自以書生不閑法令每議獄必求合於人情曰

人情所在法亦在焉郡中稱平

四朝史

參法律之曹

胡文恭行

朱逵制往司三尺之律

陳元良制

### 州都監

本朝掌本城屯住兵甲訓練差使之事兼在城巡檢資

淺者為監押

續會要四朝志

長樂郡夫人高氏為其弟求亳州

兵馬監押真宗曰護戎之任實司軍旅趙用為界河

巡檢都監虜人畏之以其常乘虎頭船故謂之趙虎頭

分外領屯衆

公是行陳欽明制

護州藩之兵

胡文恭行全克懃制

### 巡檢

本朝巡檢司有沿邊溪洞都巡檢或藩漢都巡檢或數州數縣管界或一州一縣巡檢掌訓練甲兵巡邏州邑擒捕盜賊事又有刀魚船戰棹巡檢江湖淮海置捉賊巡檢及巡馬遞鋪巡河巡捉私茶鹽等各視其名分以脩舉職業皆掌巡邏議察之事

四朝志

郭進為西山巡檢

有誣告其陰通劉繼元有異志者太祖怒命付其人於  
進進曰爾能為我取繼元一城一寨不止贖爾死罪請  
貴爾一官歲餘其人誘其一城來降進請賞以官太祖

曰賞不可濫得也進曰使臣失信則不能用人矣遂賞

以一官

分紀

景德三年封事者言諸處巡檢務在武勇強

明乞不以閩楚江浙川陝人為之上曰人之勇怯豈拘

南北若此區別非任人之道

職署

當道之衡俾邏四封之

警

胡文恭行鄭從政制

居警邏之司

高尊望制

材著幹勤職司警邏能



發擿於陰伏多剪除於寇攘

林友制

### 排岸司

本朝開封府置排岸東西南北四司掌諸路綱船輸納及糧運至京師分定諸倉交卸領各處交卸役卒指揮以備卸綱牽駕以京朝官充二人或一人所貴主轄得雜般舟船催驅卸綱稍會政和六年浙西諸州各置排岸一員從兩浙運副應安道之請也 紹興三年知臨

安梁汝嘉請專置行在排岸司又詔添文官一員七年

詔行在建康府置文臣排岸司監官一員以行在排岸司為名二年為任係京官

中興會要

### 知縣

經縣正各掌其縣之政令

禮

周子皮欲使尹何為邑曰愿

吾愛之使夫往而學焉子產曰今吾子愛人則以政猶未能操刀而使割也其傷實多子有美錦不使人學製焉譬如田獵射御貫則能獲禽若未嘗登車射御則敗績壓覆是懼何暇思獲

左傳

求也千室之邑可使為之宰

也 子游為武城宰子曰女得人焉爾乎曰有澹臺滅明者行不由徑非公事未嘗至於偃之室也 子路使子羔為費宰子曰賊夫人之子子路曰有民人焉有社稷焉何必讀書然後為學 子之武城聞絃歌之聲夫

子莞爾而笑曰割雞焉用牛刀

論語

史子產治鄭民不能欺子賤治單父民不忍欺西門豹為鄴令民不敢欺

史記

西門豹為鄴令河伯娶婦豹投巫

媼于河 西門豹鑿十二渠引河水灌民田至今皆得

水利 趙簡子使尹鐸為晉陽將行請曰為繭絲乎為

保障乎曰保障哉 吳芮秦時為番陽令甚得江湖間

心號曰番君

史記

魏襄王以史起為鄴令引漳水灌鄴以

富魏之河內民歌曰鄴有賢令兮為史公決漳水兮灌

鄴旁終古為鹵兮生稻粱 卜式牧羊上林中上喜之

式曰治民亦猶是矣以時起居惡者輒去毋令敗羣試

其治民拜緄氏令 汲黯遷滎陽令黯恥為令稱病歸

田里 焦延壽補小黃令愛養吏民化行縣中

前漢書 卓

茂遷密令吏人親愛而不忍欺教化盛行道不拾遺天

下大蝗獨不入密縣界

漢書

明帝謂羣臣郎官上應列宿

出宰百里苟非其人民受其殃

互見郎中類

王喬為葉令每

月朔望必會朝帝怪其來數而不見車騎密令太史伺

望之言其臨至有雙鳧從東南來於是候鳧至舉羅張

之但得一雙鳧焉第五倫補新都令三年之間鄰縣

歸之戶口十倍魯恭拜中牟令郡國螟傷稼不入中

牟河南尹袁安使肥親往察之恭隨行阡陌俱坐桑下

有雉止其旁旁有兒童親曰何不捕之兒言雉方雛親  
矍然起曰所以來者察君之政迹耳今蟲不犯境一異  
也化及禽獸二異也童子有仁心三異也

後漢書

劉備以

龐統為棗陽令魯肅曰士元之才百里不足以展驥足

蔣琬除廣都長諸葛亮請曰琬社稷之器非百里之

才蜀志潘岳為河陽令植桃李人號曰河陽一縣花陶

潛為彭澤令門種五柳郡遣督郵至縣吏白應束帶見

之潛嘆曰吾豈能為五斗米折腰事鄉里小兒耶解印去

縣乃賦歸去來辭 王衍為元城令終日清談縣政亦

理

晉書

丘仲季遷山陰令百姓謠曰二傅沈劉不如一丘

前傅琰父子沈憲劉元明相繼宰山陰有政聲仲季長  
於撥煩吏人號稱神明政為天下第一 顧愷之為山

陰令晝日垂簾門階閑寂務簡而事理

南史

房彥謙為長

葛令百姓號為慈父立碑頌德 開元初韋濟調鄆城

令有詔問所以安人者對凡二百人惟濟居第一 馮

元叔歷清漳浚儀始平三令右善去惡人稱為神明

蔣欽緒子沆歷陸渾監屋咸陽高陵四令美政流行郭子儀軍出其縣救麾下曰蔣賢令也供億得蔬飯足矣

毋撓其清

唐書

傳記周官有縣正春秋時縣大而郡小縣邑之長曰宰曰尹曰公曰大夫其職一也戰國郡大而縣小漢縣令長皆秦官掌治其縣萬戶以上為令減萬戶為長侯國為相後漢令掌治民顯善勸義察姦罰惡理訟平賦恤民時務晉制大縣令有治績者報以大郡不經宰縣不



得入於臺郎宋諸縣署令銅印墨綬進賢兩梁冠北齊

制上中下九等唐制縣有六等之差掌導揚風化撫字

黎氓敦四民之業崇五土之利養鰥寡恤孤窮審察冤

屈躬親獄訟

通典  
分紀

五代任官齷齪無能者始注為縣令

職源子路治蒲三年孔子入其境曰善哉恭敬以信矣入

其邑曰忠信以寬矣至其庭曰明察以斷矣子謂宓

子賤曰子治單父衆說何施而得之也對曰不齊之治

也父恤其子子恤諸孤而哀喪紀子曰小節也曰不齊

所父事者三人所兄事者五人所友者十一人子曰中節也曰此地有賢於不齊者五人不齊事之而稟度焉孔子歎曰其大者乃此乎惜乎所治者小也宓子賤為單父宰請君之近吏二人戒其邑吏令二吏書方書輒掣其肘書不善則從而怒之二吏歸報於君魯君以問孔子子曰意者以此為諫乎公歎曰寡人亂宓子之政而責其善者數矣遽發使告宓子曰自今以往有便於民者子決為之於是單父治焉 巫馬期入單父見

夜漁者得魚輒舍之而問焉漁者曰魚之大者名爲鱣  
吾大夫愛之其小者名鮠吾大夫欲長之吾是以得二  
者輒舍之巫馬返以告孔子曰誠於此者形於彼宓子  
行術於單父也

家語

宓子賤治單父彈琴不下堂而單父

治巫馬期戴星而出戴星而入以身親之而單父亦治  
巫馬期問其故宓子曰我之謂任人子之謂任力任力

者故勞任人故逸

呂氏春秋

集縣令民之師帥

董策詳見  
太守類

明明君侯臨下有赫克隆

有光惠我咫尺乃冰其清乃玉其白風抗其高雲垂其

澤君有餘愛民有餘德

江革作  
傳渾頌

於穆君侯英才宣朗聲

之所震下應如響明斷決疑易於反掌野有寇盜惟侯

屏之我有田疇惟侯闢之古人謹獄惟侯平之凡此三

惠如何勿思

孫楚梁令  
孫侯頌

荆玉不足喻其德南金未能方

其勵

徐卓孔之  
陽像贊

導王者之澤以被于下求庶人之瘼以

聞于朝

陸宣公  
草詔

用重典以威奸暴鋪太和以惠鰥嫠

柳文

未下車人懼之既下車人悅之惠如春風三月大化奸

吏束手豪宗側目

同上

吾愛崔秋浦宛然陶令風門前五

楊柳井上二梧桐山鳥下廳事夜蟾落酒中見客但

傾酒為官不愛錢河陽花作縣秋浦玉為人范宰

不買名弦歌對前楹為邦默自化日覺冰壺清百里難

犬靜千廬機杼鳴開宰江陽邑剪棘樹蘭芳城門何

肅穆五月飛秋霜

李白

東陽本是佳山水何況曾經沈隱

侯化得邦人解吟詠如今縣令亦風流新開潭洞疑仙

境遠寫丹青到雍州落在尋常畫工手猶能三伏凜生

秋劉禹錫答  
于興宗

連城為重寶茂宰得才新山雉迎舟楫江

花報邑人

故人有孫宰高義薄青雲 看君宜著王

喬履真賜還疑出上方

杜甫

本朝建隆元年應諸縣除赤畿外四千戶為望三千戶  
以上為繁二千戶以上為上千戶以上為中不滿千戶  
為中下五百戶以下為下掌總治民政勸課農桑凡戶  
口賦役錢穀賑濟及給納之事皆掌之政和二年詔縣  
令以十二事勸課農桑一曰敦本業二曰興地利三曰

戒游手四曰謹時候五曰戒苟簡六曰厚蓄積七曰備

水旱八曰戒宰牛九曰置農器十曰廣栽植十一曰恤

佃戶十二曰無妄誕

會要續要

乾道二年御筆今後非兩

任縣令不除監察御史

孝宗會要

尹洙知河南伊闕縣與穆

脩以古文革崑體之弊天下翕然宗之王禹偁知長

洲羅處約知吳縣相與日賦五題太宗聞其名召試館

職燕肅知臨邛縣民苦吏擾公削木為牘民訟有連

逮者書其姓名使召之如期而至

通鑑

葉庭直知光化縣豐

稷知穀城縣人歌之曰葉光化豐穀城清如水平如衡

史四朝

佩懸銅墨

胡文恭行陳亢制

施字人之縣譜

姚侃制

寄懸銅

之任

劉棻制

給懸銅之綬

王昭制

宜從健令之遷

趙況制

### 京畿令

史董宣為洛陽令搏擊豪強莫不震慄京師號臥虎民

歌曰桴鼓不鳴董少平

後漢書

顧憲之為建康令性清介

強力為政清且美也樂法才為建康令不受俸秩梁

武帝嘉其清節曰居職若斯可為百城表矣

南唐貞元



間上召京兆府諸縣令對於延英訪以人之疾苦各賜衣一襲 韋昭為永昌令輦轂繁要不事威刑而治

李頻為武功令畿民多橫頻治之無所貸豪猾大驚懿宗嘉之賜緋衣銀魚 高宗擢權懷恩為萬年令賞罰明時人曰寧食三斗塵無逢權懷恩 屈突蓋為長安令以威嚴顯時為語云寧食三斗艾不見屈突蓋寧食三斗葱不見屈突通 穆宗時京邑多盜賊王正雅為萬年令威震豪強尹公綽言其能就賜緋衣 張杜壽

為長安令時人以為神明

唐書

傳記明帝臨觀見洛陽令車騎意河南尹及至而非尤

其太盛敕去軒綏

漢官儀

李果為洛陽令吏民畏之有劉

兼者過其境夜聞戶外語聲曰古今正人李令是也見

其行事令人破膽我輩可於他縣血食兼開門視之無

物乃鬼神也

孔六帖

集貞元初以旬服長吏天下理本於是親擇郎吏分宰

於京師

柳文

歷宰京劇

元和制

化神臯之俗

常集

漢以四科取

士求多畧不惑強明決斷者任三輔令 漢朝郎官出

宰百里故今京邑令缺多令尚書郎補 能佩弦以自

導帶星以自勤

白集

輦轂之下豪黠僞輕擾之則獄市不

容緩之則囊橐相聚故前代京令得與御史丞分進道

路以其捕逐之急也

元集

赤縣官曹擁材僚

杜詩

本朝紹聖間詔開封祥符知縣今後差通判以資序充

四朝  
史

縣丞

史縣丞長吏也 縣百戶以上皆有丞尉是為長吏

黃霸守潁川許丞年老病聾督郵白欲逐之霸曰許丞

廉吏雖老尚能拜起

漢書

桓譚數言事忤旨出為安陵丞

忽忽不樂

張元遷陳倉縣丞清淨無欲專心經書

後漢

書唐臨為萬泉丞有輕囚十數人會春暮時雨臨白令

請出之悉令歸家耕種與之約令歸繫囚至期畢集詣

獄臨由是知名 陸景倩為扶溝丞按察使覆州縣殿最

有吏言狀曰某清某詐清惟景倩真清 宋安恭為龍

門丞年已五十八數年而登列岳每謂僚屬曰公輩但

守清白何憂不遷

唐書

傳記漢氏縣丞尉多以本部人為之諸縣皆有主刑獄

囚徒後漢署文書典知倉獄署諸曹掾吏自晉後無丞

宋惟建康有獄丞隋氏盡用他郡人

六典

唐高宗始為品

官吏部選授為縣令之貳

職林

縣有七司丞為副貳如州

上佐 隋及大唐縣丞各一人通判縣事

通典

州有上佐

縣有丞簿俗謂閒官不領公事殊乖制作之本意

續通典

裴子雨為下邳令張晴為縣丞二人俱有聲氣而善言語曾論事移時人吏竊相謂曰縣官甚不和長官稱雨贊府道晴終日如此不和也

南部新書

集丞之職所以貳令於一邑事無所不當問

藍田丞廳壁記

位高而偪例以嫌不可否事文書行吏抱成案詣丞卷其前鉗以左手右手摘紙尾鴈鶩行以進平立睨丞曰當署丞涉筆占位署唯謹博陵崔斯立種學績文以蓄其有泓涵演迤日大以肆再轉而為丞茲邑既隤不

得施用喟然曰丞哉丞哉余不負丞而丞負余庭有老槐四行南牆鉅竹千挺儼立若相持水瀼瀼循除鳴斯立痛掃溉對植二松日哦其間有問者輒對曰余方有

公事子姑去

韓文

丞之位八品以下述六職以輔其治也

柳文武功丞廳壁紀

謳吟者不歌其宰頌議者必歸於丞以管

輅之才從趙典之任

陳子昂集

九千里之丹鳳自下升高七

十日之黃龍從微至著

張鷟集

本朝天聖中開封兩縣始各置丞一負在簿尉之上熙

寧四年編脩條例所言諸路州軍繁劇縣令戶二萬以

上增置縣丞一員

會要

元祐元年詔應因給納常平免役

置丞並行省罷崇寧二年蔡京言熙寧脩水土之政行

市易之法興山澤之利皆王政之大請縣並置丞一員

以掌其事大觀三年詔除舊額萬戶以上縣令委是事

務繁冗并雖非萬戶實有山林坑冶之利可以興脩去

處依舊存留外餘皆減罷

續會要

建炎元年詔縣丞係嘉

祐以前負缺並萬戶處存留一員餘盡罷

中興會要



主簿

史仇覽字季智一名香考城令王渙署為主簿謂覽曰  
主簿聞陳元之過而不罪得無少鷹鷂之志耶覽曰以  
為鷹鷂不如鸞鳳渙謝遣曰枳棘非鸞鳳所棲百里非  
大賢所托乃以月俸資遣入太學其名大振後漢書桓溫  
辟習鑿齒為西曹主簿極為親密時語曰徒三十年看  
儒書不如一詣習主簿晉書李畬歷泥水主簿遇事鋒銳  
徐浩張說見其喜雨五色鸛賦咨嗟曰後來之英也

李栖筠有王佐才士多慕向為寇氏簿太守李峴視若  
布衣交 顧少連登封主簿邑有虎孽民患之少連移

文岳神虎不為害

唐書

傳記漢晉有之至隋始復置唐赤縣置二人他縣一人

高宗始以為品官吏部選授掌付事勾稽省署抄目糾

正縣內非違 唐主簿上轄

主諸簿目

通典

張彖為華

陰簿而為守令所抑歎曰丈夫有凌雲蓋世之志而拘  
於下位若立身矮屋之下使人擡頭不得乃棄官而歸

開元天寶遺事

閒官不領公事

詳見縣丞類

集職司符印主掌簿書

鳳棲之位鴻漸之資

唐制俾之

糾邑旌其忠蓋之心委以髣髴之職

白集脫身簿尉間

始與箠楚辭

杜詩

本朝開寶三年詔諸縣千戶以上置令簿尉四百戶以

上置令尉令知主簿事四百戶以下置簿尉主簿兼知

縣事咸平四年王欽若言川陝縣五千戶以上請並

置簿其餘仍舊以尉兼從之天禧以後諸州縣以漸增

置熙寧三年王廣淵請令主簿管稽簿書尉專管督

盜依舊外縣事並令通管寶錄簿尉佐理縣務張昇為

楚丘主簿王曾識其有公輔器吳仁澤為雍丘主簿

范純仁異之曰簿領中乃有是人耶四朝史善勾邑版之

曹能盡地力之教胡文恭行勾稽之局蘇澄往勾簿邑

之稽段林勾較簿籍均壹政賦公是馬

制

維震制

### 縣尉

史梅福補南昌尉後去官棄妻子去九江至今傳以為

仙

漢書

尉主盜賊凡盜賊發主名不立則推索行尋按察

奸宄以起端緒

後漢百官制

隋仁壽中顏籀按安養尉楊素

見籀年弱貌羸因謂曰安養尉縣何以克當對曰割雞

馬用牛刀素奇其對到官以幹理聞 貞半千授武陟

尉歲旱勸縣令開倉賑貧不從會令赴州半千便發粟

以給饑人刺史按之存撫使薛元超曰公不能救之而

使惠歸於一尉豈不愧也遽令釋之 劉仁軌轉陳倉

尉部人折衝都尉魯寧縱狠仁軌約不再犯而寧暴橫

自如仁軌殺之州以聞太宗以為剛正擢咸陽丞蘇  
珣調鄠尉時李義琰為雍州長史鄠多訟日至長史府  
珣裁決明辨義琰顧廳事曰此公坐也恨吾齒晚不及  
見 婁師德補江都尉揚州長史盧承業奇其才謂曰  
吾子台輔之器當以子孫相託何可以官屬常禮待也  
陸贄補渭南尉德宗立遣黜陟使庾何等十一人行  
天下贄說使者請以五術省風俗八計聽吏治三科登  
俊又四賦經財貨六德保疲瘡五要簡官事 白居易

調整屋尉月餘召入翰林為學士郭元振初為通泉尉任俠使氣武后欲詰與語奇之索所為文章上寶劍

篇后覽嘉之

唐書

傳記漢大縣兩尉小縣一人歷代因之銅印黃綬朝服武冠北齊郡縣置三尉隋改為正後置尉又分為戶曹法曹唐初因隋制武德中復改為正七年復為尉分判

諸司事

通典

高宗時始為品官吏部遷授

職林

唐尉分理諸

曹如州判司

通典

按李白贈瑕丘王少府別西河劉少府

贈秋浦柳少府杜甫貽華陽李少府當是唐時縣尉多

稱少府也

類要

牛僧孺為伊闕尉縣前灘出不旬日拜察

院

詳見監察御史類

漢雍仲進南海香拜洛陽尉號曰香尉

述異

記

集隱吏逢梅福遊山憶謝公

杜詩

皎皎鸞鳳姿飄飄神仙

氣梅生亦何為來作南昌尉

世人若醺雞安可識梅生

仙尉趙家玉英風凌四豪搖扇對酒樓持袂把觥盞

李白

操斷舉措通乎細大潔廉檢守形於造次

柳文柳潭行狀

心不



掛細務口不言人非

李白為李錫元去思碑

黃綬位輕而青雲望

重

陳子昂送齊少府

本朝建隆三年每縣置尉一員

實錄

元豐五年詔並差使

臣元祐元年詔除沿邊縣尉依舊外餘並差選人崇寧

元年詔重法地縣尉舊差武臣處並依元豐法

續會要

乾

德元年以大名府元城縣尉張義元為本縣令賞捕盜

之功也天下縣尉久廢其任是歲復置義元首該賞典

以激勸之寶元初有明州慈溪尉佃儻不羣雖處賤

官而有憂天下之心屢上書言事 至和中山陽尉李

宗嗔百姓申蝗抑令食之提刑奏劾上怒曰縣尉亦親

民之官謂其能慰安於民而不與民除害反傷民命削

其官

事類

守在尉察善於追胥

胡文恭行王德稅制

曩居尉督

解懷德制

### 京畿尉

史曹操年二十舉孝廉為郎除洛陽北部尉 太祖初

入尉廨造五色棒垂門左右有犯禁者皆棒殺之

魏志

韋

貫之自長安尉不數年拜相 陸操補長安尉以清幹

稱李程為藍田尉有滯獄十年程單言輒判京兆狀

最拜監察御史

唐書

傳記漢長安有四尉分為左右部城東南置廣部尉是

為左部城西北置明部尉是為右部黃綬大冠主追捕

盜賊伺察姦非

六典注

魏因之晉洛陽建康皆置六部尉

宋齊梁陳並因之唐赤縣置六負

通典

嚴安之崔譚俱為

赤尉安之令五伯執大杖譚益大其杖如椽安之復令

執小杖譚益小其杖至如節安之令五伯空手行乃不

能學

見聞紀

畿尉入御史為佛道入評事為仙道入京尉

為人道入畿丞為苦海道入縣令為畜生道入判司為

餓鬼道

御史臺紀

拾遺立緊評事出緊赤尉坐緊俗號為三

緊官

西京記

本朝建隆初置尉一員至和二年開封祥符二縣增置

一員

會要

尉於北部著發奸擿伏之能

胡文恭行陳禹臣制

監當官

集以幹蠱之才領鹽鹵之務管推條制動皆得宜

白集裴弘泰制

推東池鹵生息倍稱

元集唐  
慶制

鹽鐵推束之籍

杜牧行  
李鄠制

公

幹池鹽於蒲脩牢盆謹衡石煎和既精斂散乃盈商通  
而荐至吏懼而循法幾不絀網而國用益饒歲杪會其

所入贏羨什百

劉禹錫崔  
公垂碑

本朝監當官掌場務庫藏出納之事其征榷場務歲有  
定期以登耗為殿最賞罰凡課利所入日具數申於州

四朝  
志

太平興國三年詔諸路轉運副使常體量部內監

當官公勤廉幹顯有勞績者具名聞奏與親民差遣

慶歷四年詔舊制諸道榷酤滿三萬貫舉官監臨歲滿

而課贏者升用之

會要

劉摯責監衡州鹽倉悉意核視弊

減什七父老目為學士監

四朝史

臨榷木之酤及連教之

賞

胡文恭行何世昌制

領筭商車典臨茗局

孫詔制

當庾氏之掌

裴士

傑制局課衍盈

姚預制

商利局者以饒衍名最

賈程制

征筭之

饒衍於局次

王拱辰等制

臨筭榷之局筭無遺力沛有衍緡

毛維藩制

往幹牢盆之入頗增近監之饒

劉雖制

監司商筭

假政

制服勞廩委

公是行劉詰制

錢監

史王莽時主鑄錢官曰鍾官

後漢志

集筦官錢曰園府之職

文選

本朝開寶鑄錢監於文番陽既而江淮荆浙閩廣之地

皆有監職畧泣全冶之別司

胡文恭行成有宗制

沿挾銅之令以收

七福因採山之法用廣五銖司南州寶冶之饒佐縣

官園府之用宣勞於外興利在公

葛源制

官曹自是錫與

銅

東坡送王怡

江淮鐵錢官

傳記唐西北邊州禁人無置鐵冶續通典

本朝舊制主鐵冶者得補班行陳升之奏下議省之既

定稿吳及與沈起輒增注興國軍磁湖鐵冶如舊制國史


吳及傳

巡轄馬遞鋪

史唐劉晏初州縣取富人主郵遞謂之捉驛 大厯十

有一年華原封侯莫等以主郵傳優改長安尉唐書





記纂淵海卷三十五